

Na temelju Člana 24. stav 1. tačka 3. Statuta Ljekarske-Liječničke Komore Kantona Sarajevo, Skupština Ljekarske – Liječničke Komore Kantona Sarajevo na sjednici održanoj dana 27.10.2023 godine donosi sljedeći:

PRAVILNIK

O ODGOVORNOSTI ČLANOVA KOMORE

I OSNOVNE ODREDBE

Član 1.

Ovim pravilnikom reguliše se pokretanje i vođenje postupka protiv članova Komore radi povrede dužnosti i/ili ugleda ljekarskog-liječničkog zvanja, pravila prvostepenog i drugostepenog postupka, ponavljanje postupka, zastara pokretanja i vođenja postupka, izvršenje mjera, brisanje izrečenih mjera, kao i ostala pitanja od značaja za zakonito provođenje postupka.

Član 2.

Pojedini izrazi upotrebljeni u ovom pravilniku imaju sljedeće značenje:

“Komora” je Ljekarske – Liječničke Komore Kantona Sarajevo;

“Sud Komore” je prvostepeni disciplinski sud;

“Sud Ljekarske – Liječničke komore F BiH” je drugostepeni disciplinski sud;

“Tužitelj Komore” je tužitelj Ljekarske –Liječničke Komore Kantona Sarajevo;

“Federalni tužitelj” je disciplinski tužitelj Ljekarske – Liječničke Komore F BiH;

“Disciplinski postupak” je postupak koji provode disciplinski organi u skladu sa zakonom, Statutom Ljekarske – Liječničke Komore Sarajevo, Statutom Ljekarske – Liječničke Komore F BiH, Pravilnikom o drugostepenom disciplinskom postupku pred Ljekarskom –Liječničkom Komorom F BiH i ovim pravilnikom;

“Prijavljeni” je liječnik protiv kojeg je podnesena prijava radi povrede dužnosti i/ili ugleda ljekarskog zvanja;

“Osumnjičeni” je svaki liječnik član Ljekarske – Liječničke Komore Kantona Sarajevo protiv kojeg je podnesen zahtjev za utrdivanje povreda dužnosti i/ili ugleda ljekarskog zvanja;

“Odgovorni” je svaki liječnik kojem je pravomoćno izrečena disciplinska mjera;

“Stranke u postupku” su Tužitelj Komore i osumnjičeni, odnosno odgovorni;

“Branilac Komore” je branilac člana Komore određen Statutom Ljekarske – Liječničke Komore Kantona Sarajevo ili lice koje opunomoći osumnjičeni;

“Disciplinske povrede” su lake, teže i teške čiji stepen cijeni u svakom pojedinom slučaju Sud Komore;

„Disciplinske mjere“ su sve disciplinske mjere propisane Pravilnikom o drugostepnom disciplinskom postupaku pred Ljekarskom – Liječničkom Komorom F BiH.

Član 3.

Ovaj Pravilnik obavezan je za stranke u postupku i za Sud Komore.

Poslovníkom o radu Suda Komore se uređuje način rada istog u skladu sa Statutom Ljekarske – Liječničke Komore Kantona Sarajevo i ovim pravilnikom.

II POKRETANJE POSTUPKA

Član 4.

Prijavu za pokretanje postupka protiv liječnika može podnijeti svako lice.

Prijava se podnosi Tužitelju Komore.

Ako prijava bude podnijeta bilo kojem organu Ljekarske – Liječničke Komore Kantona Sarajevo, taj organ je dužan odmah, a najkasnije u roku od osam (8) dana po prijemu iste, prijavu dostaviti Tužitelju Komore.

Član 5.

Tužitelj Komore dužan je u roku od trideset (30) dana po prijemu prijave ispitati prijavu te ukoliko ocijeni da iz same prijave ne proizilazi da u opisanim radnjama prijavljenog ima obilježja povrede dužnosti i/ili ugleda liječničkog zvanja ili da je nastupila zastarjelost disciplinskog gonjenja, donijeti rješenje o odbacivanju prijave i isto u roku od osam (8) dana dostaviti podnosiocu prijave i prijavljenom.

Ukoliko Tužitelj Komore smatra da u radnjama prijavljenog postoje obilježja povrede dužnosti i/ili ugleda liječničkog zvanja, dužan je u roku od osam (8) dana prijavu sa priložima dostaviti prijavljenom na izjašnjenje.

Danom kada je Tužitelj Komore zatražio izjašnjenje prijavljenog započinje disciplinski postupak.

Prijavljeni može u roku od petnaest (15) dana po prijemu zahtjeva Tužitelj Komore izjasniti se pismeno o podnesenoj prijavi. Po prijemu pismenog izjašnjenja prijavljenog ili po proteku roka za davanje izjašnjenja, Tužitelj Komore dužan je najkasnije u roku od 30 dana podnijeti zahtjev za

pokretanje postupka utvrđivanja povrede dužnosti i/ili ugleda ljekarskog zvanja ili donijeti rješenje o obustavljanju postupka iz razloga propisanih stavom 1. ovog člana.

Član 6.

Rješenja iz člana 5. ovog pravilnika Tužitelj Komore dužan je dostaviti u roku od osam (8) dana od dana donošenja podnosiocu prijave.

Protiv rješenja iz stave 1. ovog člana podnosilac prijave ima pravo žalbe Federalnom tužitelju u roku od petnaest (15) dana od dana prijema rješenja.

Član 7.

Neovisno od podnešene žalbe iz člana 6. ovog pravilnika, Federalni tužitelj može zatražiti od Tužitelja Komore da mu odmah dostavi kompletan spis disciplinskog predmeta. Po prijemu spisa Federalni tužitelj može u rokovima iz pravnih akata Ljekarske – Liječničke Komore F BiH ispitati prijavu i nakon toga odlučiti da rješenje iz Člana 5. stav 1. ovog pravilnika ostavi na snazi ili da ga stavi van snage i podnese zahtjev za pokretanje postupka za utvrđivanje povrede dužnosti i/ili ugleda ljekarskog zvanja pred nadležnim prvostepenim organima.

Član 8.

Zahtjev za pokretanje postupka utvrđivanja povrede dužnosti i/ili ugleda ljekarskog zvanja podnijet od strane Tužitelja Komore pred nadležnim prvostepenim organima zastupa tokom cijelog prvostepenog postupka Tužitelj Komore.

Zahtjev za pokretanje postupka utvrđivanja povrede dužnosti i/ili ugleda ljekarskog zvanja podnijet od strane Federanog tužitelja pred nadležnim prvostepenim organima zastupa tokom cijelog prvostepenog postupka Federalni tužitelj.

Član 9.

Protiv Zahtjeva za pokretanje postupa utvrđivanja povrede dužnosti i/ili ugleda ljekarskog zvanja nije dozvoljen pravni lijek.

III PRVOSTEPENI POSTUPAK

Član 10.

Kada Tužitelj Komore ili federalni tužitelj podnese zahtjev za pokretanje postupka utvrđivanja povrede dužnosti i/ili ugleda ljekarskog zvanja, Sud Komore dužan je najkasnije u roku od 30 (trideset) dana po prijemu zahtjeva za pokretanje postupka utvrđivanju povrede dužnosti i/ili ugleda ljekarskog zvanja zakazati pripremno ročište.

O pripremnom ročištu se pisanim pozivom obavještavaju tužitelj koji je podnio zahtjev za pokretanje postupka utvrđivanja povrede dužnosti i/ili ugleda ljekarskog zvanja, osumnjičeni i Branilac Komore.

Osumnjičenom i Branicu Komore se uz poziv dostavlja zahtjev za pokretanje postupka utvrđivanja povrede dužnosti i/ili ugleda ljekarskog zvanja sa dokazima.

Poziv osumnjičenom sadrži i upozorenje da će se, ukoliko uredno obaviješten ne pristupi na ročište, isto održati u njegovom odsustvu, kao i da je poziv dostavljen Branioocu Komre i da ima pravo da ga u postupku zastupa izabrani branilac (punomoćnik).

Osumnjičenom se se poziv i zahtjev za pokretanje postupka utvrđivanja povrede dužnosti i/ili ugleda ljekarskog zvanja dostavljaju na posljednju adresu koju je Ljekarskoj – Liječničkom Komori Kantona Sarajevo označio kao svoje prebivalište i ukoliko je dostavio svoju e-mail adresu, elektronskom poštom.

Ukoliko osumnjičeni ne primi poziv i zahtjev za pokretanje postupka utvrđivanja povrede dužnosti i/ili ugleda ljekarskog zvanja na adresama iz prethodnog stava, Sud Komore će još jednom ponoviti dostavljanje.

Smatra se da je osumnjičeni uredno obaviješten po proteku roka od 7 dana od dana slanja poziva i zahtjev za pokretanje postupka utvrđivanja povrede dužnosti i/ili ugleda ljekarskog zvanja na adrese iz prethodnog stava.

Pravila dostavljanja iz ovog člana odnose se i na zakazivanje glavne rasprave, ukoliko stranka nisu prisustvovala ročištu na kojem je zakazana glavna rasprava.

Član 11.

Tužitelj Komore ili Federalni tužitelj i osumnjičeni dužni su na pripremnom ročištu predložiti i donijeti sve dokaze koje namjeravaju provesti na glavnoj raspravi i predložiti okolnosti na koje će se dokazi provoditi.

Izuzetno, strankama u postupku dozvolice se provođenje dokaza koje nisu predložili do zaključenja pripremnog ročišta samo ako dostave dokaz da nisu bili u mogućnosti predložiti njegovo provođenje do zaključenja pripremnog ročišta.

Član 12.

Sud Komore će na pripremnom ročištu, uz konsultaciju sa strankama odrediti termin održavanja glavne rasprave najkasnije u roku od 30 dana od dana održavanja pripremnog ročišta.

Tužitelj Komore ili Federalni tužitelj i osumnjičeni će se u pozivu ili na pripremnom ročištu poučiti da će se glavna rasprava održati i u njihovom odsustvu.

Sud Komore može odrediti da će se glavna rasprava održati odmah nakon pripremnog ročišta posebno u slučajevima kada se predlaže uvid i čitanje isprava i dokumenata i saslušanje stranaka prisutnih na pripremnom ročištu.

Član 13.

Glavnu raspravu sprovodi Sud Komore.

Glavna rasprava je javna i sa iste se javnost može isključiti ukoliko Sud Komore smatra da javno provođenje rasprave može naštetiti interesima maloljetnika ili javnom interesu.

Član 14.

Ako je nakon izvršene povrede dužnosti i/ili ugleda ljekarskog zvanja, a prije pokretanja disciplinskog postupka došlo do prestanka članstva u Komori, disciplinski postupak se ne može pokrenuti.

Ako nakon pokretanja disciplinskog postupka dođe do prestanka članstva u Komori, disciplinski postupak će se nastaviti i okončati. Odluke o disciplinskoj odgovornosti u tom slučaju upisuju se u odgovarajuće imenike i iste imaju pravne efekte kod ponovnog učlanjenja.

Odluke iz prethodnog stava dostavljaju se na znanje svim kantonalnim Komorama i Ljekarskoj-Liječničkoj Komori Republike Srpske.

Član 15.

Prvostepeni disciplinski postupak obavezno će se prekinuti samo u slučaju da je za istu radnju ili propuštanje koji su predmet disciplinskog postupka pokrenut i traje krivični postupak za krivično djelo, a od ishoda tog postupka, zavisi ocjena o postojanju disciplinskog prekršaja.

Disciplinski postupak može se prekinuti u slučaju kad nadležni tužitelj ocijeni da je to potrebno u slučaju teške bolesti ili privremene duševne poremećenosti osumnjičenog.

O prekidu postupka Sud Komore donosi rješenje u kojem je dužn navesti razloge prekida postupka i trajanje prekida.

Rokovi zastarjelosti disciplinskog gonjenja za vrijeme trajanja kao i za vrijeme prekida disciplinskog postupka prestaju teći.

Član 16.

Nakon završene glavne rasprave, Sud Komore je dužan da u roku od 30 (trideset) dana donese i objavi odluku u prisutnosti stranaka.

Odlukom, zahtjev za pokretanje postupka utvrđivanja povrede dužnosti i/ili ugleda ljekarskog zvanja može biti odbačen kao neblagovremen i neuredan ili odbijen u cijelosti ili djelimično kao neosnovan ili osumnjičeni proglašen odgovornim za povredu dužnosti i/ili ugleda ljekarskog zvanja koji mu se

zahtjevom za pokretanje postupka utvrđivanja povrede dužnosti i/ili ugleda ljekarskog zvanja stavlja na teret, u kom slučaju će sadržavati i odluku o disciplinskoj mjeri.

Odluka će se objaviti i kad osumnjičeni i nadležni tužilac nisu prisutni njezinom objavljivanju.

Izvornik Odluke nakon vijećanja i glasanja unosi se u zapisnik, bez navođenja kako je pojedini član Suda Komore glasao, a zapisnik o vijećanju i glasanju odlaže u kovertu koja se odmah zatvara i pečati. Ovu kovertu nije ovlašten da otvori bilo koji organ, izuzev Suda Komore.

Član 17.

Prilikom određivanja vrste i težine disciplinske mjere propisane Pravilnikom o drugostepenom disciplinskom postupku pred Ljekarskom – Liječničkom Komorom F BiH, Sud Komore je dužan cijeniti sve okolnosti propisane zakonom, Statutom Ljekarske – Liječničke Komore Sarajevo, Statutom Ljekarske – Liječničke Komore F BiH i Kodeksom medicinske etike i deontologije.

Član 18.

Najkasnije u roku od osam (8) dana po objavljivanju Odluke, njezin pisani otpravak će se dostaviti strankama u postupku .

Pisani otpravak Odluke obavezno sadrži: uvod, izreku, obrazloženje i pouku o pravnom lijeku.

Uvod sadrži: oznaku Suda Ljekarske-Liječničke Komore Kantona Sarajevo, broj predmeta, datum donošenja, naznačenje tko je od stranaka bio prisutan glavnoj raspravi i naznačenje da li je odluka objavljena u ili bez prisutnosti stranaka u postupku.

Izreka sadrži: činjenični opis povrede dužnosti i/ili ugleda ljekarskog zvanja za koji je osumnjičeni proglašen odgovornim, pravnu kvalifikaciju disciplinskog prekršaja u skladu sa zakonom, statutom i Kodeksom medicinske etike i deontologij i izrečenu disciplinsku mjeru.

Obrazloženje sadrži: naziv disciplinskog tužioca koji je podnio zahtjev za pokretanje postupka utvrđivanja povrede dužnosti i/ili ugleda ljekarskog zvanja, sažete navode iz zahtjev za pokretanje postupka utvrđivanja povrede dužnosti i/ili ugleda ljekarskog zvanja, opis povrede i njegovoj pravnoj kvalifikaciji, razloge na kojima se temelji izreka Odluke u pogledu odgovornosti osumnjičenog, izrečene disciplinske mjere i ocjenu dokaza na kojima se temelji Odluka.

Pravna pouka sadrži: uputu o pravu na podnošenje pravnog lijeka, organu kojem se podnosi i roku u kojem se podnosi.

Član 19.

Protiv odluke Suda Komore dopuštena je žalba u roku od petnaest (15) dana od dana prijema pisanog otpravka iste Sudu Ljekarske – Liječničke Komore Federacije BiH.

Žalba se podnosi Sud Komore u dovoljnom broju primjeraka za Sud Komore i stranke u postupku.

Sud Komore u roku od osam (8) dana od dana prijema žalbe dostavlja žalbu na odgovor strankama u postupku koje mogu u roku od tri (3) dana dostaviti odgovor na žalbu.

Sud Komore dužan je u roku od osam (8) dana po prijemu odgovora na žalbu ili po proteku roka za davanje odgovora na žalbu, prije dostavljanja žalbe Sudu Ljekarske – Liječničke Komore F BiH istu ispitati u skladu sa Pravilnikom o drugostepenom disciplinskom postupku pred Ljekarskom – Liječničkom Komorom F BiH i istu u daljem roku od osam (8) dana dostaviti Sudu Ljekarske – Liječničke Komore F BiH.

IV DRUGOSTEPENI POSTUPAK

Član 20.

Drugostepeni disciplinski postupak provodi se u skladu sa Pravilnikom o drugostepenom disciplinskom postupku pred Ljekarskom – Liječničkom Komorom F BiH.

V PONAVLJANJE DISCIPLINSKOG POSTUPKA

Član 21.

Disciplinski postupak koji je pravomoćno završen može se na prijedlog stranke u postupku ponoviti.

Ponavljanje postupka dozvoljeno je samo u slučaju saznanja za nove činjenice ili za nove dokaze koji se odnose na već iznesene činjenice u postupku čije se ponavljanje traži, a te nove činjenice i novi dokazi sami za sebe ili u vezi sa ranije utvrđenim činjenicama i izvedenim dokazima očigledno mogu dovesti do drugačije Odluke.

Član 22.

Prijedlog za ponavljanje postupka može se podnijeti u roku od trideset (30) dana od dana saznanja za nove činjenice i nove dokaze, a najkasnije u roku od jedne (1) godine dana od pravosnažnosti odluke donesene u postupku čije se ponavljanje predlaže.

Član 23.

O prijedlogu za ponavljanje postupka odlučuje sud Komore čija je pravosnažna odluka predmet prijedloga za ponavljanje postupka.

Član 24.

Protiv odluke suda Komore donesene po prijedlogu za ponavljanje postupka, dopuštena je žalba u roku od 15 dana od dana prijema odluke drugostepenom sudu, a ako je odluku donio drugostepeni sud protiv iste se može pokrenuti upravni spor pred nadležnim kantonalnim sudom u roku od 30 dana od dana prijema odluke.

Član 25.

Prijedlog za ponavljanje postupka nije dopušten protiv odluke disciplinskog suda kojom je utvrđena lakša povreda dužnosti i/ili ugleda ljekarskog zvanja i izrečena mjera za takvu povredu.

VI ZASTARA DISCIPLINSKOG GONJENJA I IZVRŠENJA DISCIPLINSKIH MJERA

Član 26.

Disciplinski postupak ne može se pokrenuti protekom roka od tri (3) godine od dana počinjenja disciplinske povrede.

Ako učinjena povreda dužnosti i/ili ugleda ljekarskog zvanja ima i bitna obilježja određenog krivičnog djela, zastara pokretanja disciplinskog postupka nastupa kada po Krivičnom zakonu Federacije BiH nastupa zastara krivičnog gonjenja za to krivično djelo.

Zastara disciplinskog gonjenja se prekida svakom radnjom nadležnog organa disciplinskog gonjenja usmjerenom na pokretanje i vođenje disciplinskog postupka i rokovi zastare počinju iznova teći.

Zastara disciplinskog gonjenja nastupa u svakom slučaju kad protekne dvostruko vrijeme propisano za zastaru u stavu 1.ovog člana.

Član 27.

Zastara izvršenja disciplinskih mjera nastupa kad proteknu dvije (2) godine od dana pravosnažnosti odluke kojom je disciplinska mjera izrečena.

Zastara iz prethodnog stava prekida se svakom radnjom nadležnog organa usmjerenom na izvršenje disciplinske mjere, a nakon prekida zastara počinje ponovo teći.

Zastara izvršenja disciplinske mjere nastupa u svakom slučaju kad protekne četiri (4) godine od pravosnažnosti odluke kojom je izrečena disciplinska mjera.

VII IZVRŠENJE, EVIDENCIJA, PRAVNE POSLJEDICE I BRISANJE IZREČENIH DISCIPLINSKIH MJERA

Član 28.

Izvršenje, evidentiranje, pravne posljedice i brisanje izrečenih disciplinskih mjera provode se u skladu sa Pravilnikom o drugostepenom disciplinskom postupku pred Ljekarskom –Liječničkom Komorom F BiH.

VIII PRELAZNE I ZAVRŠNE ODREDBE

Član 29.

Svi disciplinski postupci, koji su započeti prije usvajanja ovog pravilnika nastavljaju se pred organima i po postupku propisanim ovim pravilnikom.

Disciplinski postupci u kojima je donesena prvostpena odluka provedeće se prema odredbama Pravilnika od odgovornosti članova komore od 30.07.2002. godine.

Član 30.

Upravni odbor Ljekarske – Liječničke Komore Kantona Sarajevu dužan u roku od jedan (jedan) mjesec od dana stupanja na snagu ovog pravilnika donijeti pravilnik o radu Suda Komore u skladu sa ovim pravilnikom.

U započetim postupcima primjenjivaće se odredbe važećih pravilnika o radu, ukoliko nisu u suprotnosti sa odredbama ovog pravilnika.

Član 31.

Ovaj Pravilnik stupa na snagu danom donošenja.

Stupanjem na snagu ovog Pravilnika, prestaju da važe Pravilnici o odgovornosti članova Komore, i to Pravilnik o odgovornosti članova Komore od 30.07.2002. godine, kao i Pravilnik o odgovornosti članova Komore od 30.06.2020. godine

Broj: 1232/2023
Sarajevo, 27.10.2023. godine

Predsjednik Skupštine
Ljekarske-Liječničke Komore Kantona Sarajevo

dr. Semin Bećirbegović



